


ஹாது மகொ சளிஸு

தாடா. ஸுப்ரமண்யம்



ப்ரஸுரகர்த்தா

மீமந் நடன கோபாலநாயகி ஸ்வாமிகள் இலக்கிய மன்றம்

8 காந்தி சாலை, இராசிபுரம் 637 408.

K. S. Senthilkumar
Madurai

ஹாது மகொ சளிஸ்

தாடா. ஸுப்ரமண்யம்

கெனி கெதொ கீதுன் சொக்கட்
கெரன் முஸய்கீ அம்ரெ பாஷாம்
மெனி தக்கிலி மூலாம் பிஸிகின்
மிங்கிலி வத்தான் கெரத்தெ ஸொடொ
பனி ஸொகன் ஸுல்பெம் ஹொயெ
பாஷொ அம்ரெ; திடவ் கெர்லினு
உனி தெரிகின் ஒழ்செத் புலகுர்
ஹொணாத்தெ காமுஸ் நீ; ஹொடொ.

ப்ரஸுரகர்த்தா

ஸ்ரீமந் நடன கோபாலநாயகி ஸ்வாமிகள் இலக்கிய மன்றம்
8 காந்தி சாலை, இராசிபுரம் 637 408.

பயல் பொகினி : ஆவணி 688 / ஆகஸ்ட் 2000
ஸ்ரீ க்ருஷ்ண ஜயந்தி

பாத்யு : லிகுனாகுக்
மோல் : 5 ருபாய்

நிம்பினி : சாந்தாராம் பிரிண்டர்ஸ்

(மினி ஆப்செட்)

1 பந்தடி 7வது தெரு, மதுரை 1. போன் : 730201

ஹாது மகொ சளிஸு

தாடா. ஸுப்ரமண்யம்

விணாயி ஸ்துதி

மகொ வினாய மானவு மஹத்வு
சொகொ ஸங்கத்தக் தோத்கன் - மொகொ
கவத்தக் ஸக்தி தே கஜமுக விணாயி, மீ
ஜீவத்தக் ஹோர்ஹோர் ஜிகி.

காவ்யு

1. ஸோசுன் திரரியொ ஸுபொவ்ஸு பனிஹால்,
தூசுன் செரியொ ஸவ்லாம் - லோசும்
மானம் ஜீவரியொ மகொ வின்னார் ஹால்,
கானும் அய்குவொ கள்ளி.
2. கென்னாத்தக் முஸய்கீ கேரு காமுனு, மகொ
வின்னாத்தக் ஹோடய்கீ வேட் ? ஸின்னாத்தக்
பஞ்சலொ தொக்கரிய பாஞ்யினுக் நமுனொ, கோஸ்
அஞ்சலொ கெர ஹோனா அமி.
3. ஸுத்துரு தொரி ஒண்டெ ஸுத்தரு தொவி பந்தி
உத்தரு தெஷுனு உட்செதி - பித்தரு
ஜீகீன் பிரய் நெளி, ஜெகது நியதி யேஸ்,
தீகீன் கள்வத்தெ தெரும்.

4. சுண்ணா பனிம் படி கெட்டொ தொக்கன் அம்மான், ரெங்கு
பொன்னாம் தயி சொக்கட் புவ்டன், - எரின்னான்:
லம்பு லம்பு பொங்குனும் லசுவக ஸுக்க தகன்,
பிம்பன் ஜாடு நீடாம் பிளி.
5. கேஸுக் தெயில் லவி கிராப் ஒர்பெ ஸொகனு
ஆஸும் தயெ தனி அனிகினு - பேஸும்
பிஜ்ஜடி குஞ்சி தயி பெத்கெ கெரி சொக்கட்
ஸுக்கடி குவ்ணி ஹெடி தொவன்.
6. வஜ்ஜிர் தயி ஸுக்கடன், வராம் ஹரனும். ரெங்குன்
பிஜ்ஜெ பஷுத் தனி பெத்கரன், - நிஜ்ஜம்!
சுள்ளொ கெரி தொவன் குவ்ணி பில்லல் ஸொகன்,
புள்ளொ எனு கெர்ரிய போள்.
7. பொண்ணி கெரத்தகு பொதிவி பஜெ, பெந்து
ஸொண்ணிக் கம்பி ஜெதொ ஸோயொ, - கண்ணி,
முடொ, கொல்கி லய்டொ, மூரா வள்டி, தேர்,
குடொ. சார் தெனு சும்பு.
8. பங்கார் வினரிய பஷுது ஸவ்ணெ கெடி!
தெங்கார் சூரும் தேனா - ஸர்கார்
தேரிய ஸெல்கெ கள்ளி ஜிவெத்தெ வாட் கெல்லி
காரிய கவ்னம் பெள்ளி கால்.

9. நிளா வனி தனிம் நித்தக ரெங்கு தயெ
களா வனி படி கவ்லி - பொளாக்
ஒண்டொ புட்டொ தகன் ஒகோகு மர்ச்சி ஸிவி
கெண்டொ ரேக் தெயார் கெரி.
10. கவ்லாம் தொப்பலும் காவேரி நெத்திகு
வெவ்லாம் மழி தமெ வெடிக்கன் - ஸவ்லான்
வேடுன் துப்டான் வினரிய தனி தாகு
பூடும் நெளி தமய் பொடி.
11. மேகும் தமரியொ மின்னல். பூடு மத்திம்
தாகும் தமரியொ தயெ நெளி! - போகும்
அஞ்சன் தொவெ ஸவ்லொ அளினு ஸிங்கார் ஹொவ்டய்,
கிஞ்சன் ஸெந்தெவ் ஸேகீ?
12. ஸொளபார் ஹுடரிய ஸுரிது கிரணுன் ஜாடும்
தொளொபோர் அவரேஸ் துரிகின், - பொளொபோர்
விந்தி தயெ புட்டாம் விங்கரு ஸமர்து ஸோன்
ஸந்தி விதுவிது வனிம் தாக்.
13. ஹாது மகா பொட்டொ ஹாத் போர் கடிகின் தீ
ஹாது சொவ்ளி கல்லியெத் ஆஹா! - வீதும்
ஸகினுக் ஜெபாவ் ஸங்கி முஸுனா, த்யே
ஸுகமுக் ஸமான் நீ: ஸோட்.

14. வேடும் ஸவ்லாம் விதுவிது அஞ்சுனும்
பேடுன் ஸியெதீஸ் ப்ராமோ! - ஹோடுர்
பனி உரய் பில்லத்தக், பாட் பொடெ ஹாதுனாக்
உனி தெரி நந்தத்தக் ஹுடய்.
15. தார் ஒர்தொ ஸிங்கார்க தகரிய முக்கு ஸொகன்
சார் போடு பேடுன் தய்ரிய - பார்ஹாது
ஸவ்லொ விலாஸ் கெரி ஸவொ, துளி துளிகின்
வெவ்லொ தமெ தானு வெடிக்.
16. மொட்ட ஹோடெ பெட்கிக் முதுல்லொ ஹாது மகா
பொட்டொ பிரடன், ஆயுஸ் பொரய், - தெட்டொ
ஜெல்லெடும் பனி கலன், ஜிவத்தெ வாட் களடன்,
ஹொல்லெடும் பொவ்ரன் ஹொடி.
17. பளபள கெரி மின்னய் பஷுது அஞ்சு, பொதரும்
களநிள வனிம் தயெ கம்பி - தளதள
காந்துன் பில்லிகின் கலாஹுரிக் ஜாஸுனு
காந்துன் ஸொகன் பூஞ்யிர் சலி.
18. புட்டா ஸவ்லொ பில்லி பூஷுக சொவ்ளி கல்லி
கூட்டாம் குண்டா பூல் தொவ்லி - கொட்டாம்
நொவ்ரி அவி பிஸெத் நொவ்ரா மாய் ஹொயெ
தொவ்ரி மெஸ்ளி தகய் தொளொ.

19. திவ்வோட் தனி ஸந்தி ஜெக்காடு பேட் தயி
திவ்வோட் படி வினெ ஜெங்காளம் - திவ்வோட்
விலாஸ் கெரி தயெதி வீத் போர் மூகொ பிஸி
பலாஸ் அய்குவாயி பரித்.
20. கெடி ரெங்கு தயெ கெம்பு தனிம் நின
படி வினெதி பளபளாய் - ஹொடி
பொவ்ரி ஸொஸுராங் கேர் பொல்லி ஸொடெத் ஸஸு
நொவ்ரிக் திஷ்டி ஹெடய் நொம்மி.
21. ஹொராட் வனா வெடிகும் ஹொடெ பெட்கின் பில்லரிய
கொரா ஸவ்லாம் தொளொ கொவி - பராட்
அவெ பல்சொ புஸஸுன் அஸ்கி ஸகின், கல்பனாம்
மொவெ கெதொ ஸங்கி முஸன்.
22. கீத் கவ்லி அஸிலி கேரளி தியெ ஸிள்ள
பாத் கய்தி பேஸுன் பனி; - ஹாத்மகொ
வினரிய துர்பளு விங்கருன் ஜிவத்தக்
ஸினரிய ஸெக்கானி ஸியெத்.
23. சிடினு கூட் ஸொகன் ஸிங்கார் கொம்மொ சுண்டி
படினு ஹுலிகின் பராதுக் - ஹுடினு
பிர்ஸொ பாத் ஹந்தய் பெய்லு, ரெடாம் பிஸி
வார்ஸொ கெண்டொ பொரய் வனிம்.

24. தூத் கட்டி தல்லொ தனி அனய், பெயல்
ஹாத் திஜள்ளி ஸந்தய் அக்க - பாத்
ஹந்தத்தக் தல்லொ ஹாத் தேய், ஸொம்பு
பொந்தத்தக் தீ நுருன் புரொ.
25. படி ஹுலத்தெ வேள் பண்டிக் பண்டொ ஸியெதி
கடி காத்தக் ஹாத் களஸு - ஹுடி
அவி லெகுத்தொ பிஸி ஆஸ்தொ களடய், செரி
மொவி லுச்சஸுன் மொதி.
26. பண்டொ மகொ வினத்தக் பண்டி படி ஹுல்லொ,
கெண்டொ பொன்னொ, கிஸொதி - ஒண்டொ
காடுக் பாத் ஹந்துனொ, கவஞ்சி நுரு ஹொவ்நொ,
வாடுக் துஸுரெ நீ வாட்.
27. ஆட் ஸொவ்டி கம்டி அய்தொ கெரி சவ்லி
பாட் பொடி வினெத் பலு ஸே; - கேட் முடி
பிஸெத் விங்கர் ஜிவ்னம் பிஜ்ஜெ கொவதுஸ், அங்குன்
புஸெத் ஸெக்கானி புரொ.
28. கல்லொ பெவ்டி பெயல் சொக்கட் பாத் ஹந்தய்,
தல்லொ பூடு கம்டி சவ்லய்; - பில்லொ
பன்டம் ஜான் முல்லொ பஷுது பொத்தி கள்ளி
ஹொஸ்டர் பிஸிகின் ஹுலய்.

29. ரெடாம் மாள் சொக்கட் ரியெத் படி ஹுலாய், தாரு
தடாம் கீள் ரியெத் ஜகாய்;- ம:டாம்
தீஸ் தின்னு மகொ வினெத் தீன் பூடு பாத் ஸெர்க்க
வீஸ் தின்னு கவ்வாய் வெக்கி.
30. ரொவ்வ கெடும் எள்ள பாத் ருப்பின் சய்லி கய்திகினு
திவ்வ கெடும் மகாம் ஜேடன், - நொவ்வ
தினுஸுக் கிரயி ரியெத் தின்னு நிம்மள்க ஸெரய்,
மனஸுக் மெளி ஸொம்பு மகய்.
31. தெஸ்ஸு ஒர்ஸு பில்லாக் தெரும்கீ மகாம் தய்கின்
ரெஸ்ஸு பிளத்தெ ரீதி? - துஸ்ஸொ
வாட் ஸேகீ எங்கொ, வணால் வடத்தெ காம்
ஸோட் மெனெத் கோனக் ஸொடன்?
32. பட்டெ சொக்காய் தய்லி பஸ்டமுக் ஜாரேஸ் நு:ரு,
புட்டெ ஸிலேட். நீ: பொஸ்தவ்; - முட்டெ
ஜீவும் திடவ் நீஸ்தக் ஜிவராஸ் தல்லொ பெய்ல்,
பாவும் தெனு கெரெய பாவ்.
33. செதுவ் நீஸ்தக் குடும்பம் செதுரரேஸ், விங்கர் மெனெத்
மதிவ் தேரானி மட்டான். - ஹிதவ்
கென்னார் நீஸ்தக் எனொ கிஸ்கிட்டரேஸ் கொம்மொ பிஸி.
பொன்னாம் பாத் ஹுப்பய்கீ போர்?

34. ரீண் நீஸ்தெ ஜிவ்னம் ரொங்குனாருக் நீ, விங்கருக்
ரீண் நீஸ்தெ தின்னு ஸேகீ? - தீன்
தாத் மடாக் கடெத் தனிபடி ஸெர்க்க அப்பெத்
ஸாத் தோருக் நுவன் ஸதா.
35. மகொ பார் பொள்ளஸ் மர்ச்சி பொவ்ஸ் பொடெத்
தெகொ ஜிவ்னம் திக்கெஸ் - சொகொ
பொர்குல் லவெத் துட்டஸ், பொதன்க வினெத் நெளி
ஜிர்கன் தேனி. குண்டெ ஜெளஸ்.
36. மென்னாத்தக் களாய்கி, விங்கர்னு துர்பருப்பன்
தின்னாத்தக் ஸமுஹ் செடய்கீ?- ஸின்னாத்தக்
போட் போர் வேன் வினெத் பொக்கு கடத்தக், நுருக்
போட் போர் பாத் தகத்தக் புரய்.
37. ஸங்கன் முஸய்கீ, ஸங்கி ஹாது மகா
விங்கர் பொடரிய வேதனொ. - எங்கொ
தாம் ஜுக்கு பஜெ மகொ தகத்தகு, சொக்கட்
காம் கெரத்தக் யேஸ் கால்.
38. மகொ வினத்தெகொ மானமுக் பொட்டொ
கொகொ அப்பரெனி கொப்பிமு? - எகொ
போடுகு அப்பரியொ புரரெனி, ஸமுஹும்,
கோடுகு கரன் நீ: கொடுக்.

39. ஒர்ஸு ஹோய்யெ மெனெதி உனி மகொ வினாரெனி,
பிர்ஸொ ஜோடும்புல் பிஸுல்லரேஸ்; - தெர்ஸு
ஹூரிக் ஜான் முஸரெனி ஹோடெ நுஹுன்னுக், ஸர்கார்
பிரி ஸானா ஜியெத் பிஸ்கொ.

40. ஸொந்து ஹோயெதினு ஸோகாந்து ஹோயெதினு
பந்து ஜெனுலுன் பஜெஸி - ஸெந்தும்
பொண்டி தூர் தாம் பஜெ பொண்ணி கெரத்தகு, கோஸ்
ஹிண்டி பிரெத் ஹோய் ஹீன்.

பலுன்

ஸாதும் ஒண்டெதிதி ஸவ்காஸ்க பிஸி ர:தொ
ஹாது மகொ சளிஸு ஹள்ளு - ஹாதும்
கள்ளி செவ்தி ஸியெதி களாய் லவ்காஸ், ஜிவ்னம்
மெள்ளி ஹோய் ஜுக்கு மேட்.



ஓம் ஸ்ரீராம் ஜயராம் ஜயஜயராம்

ஸவ்ராஷ்ட்ருனுக் நமஸ்கார். ஸவ்ராஷ்ட்ரி இகராத்தெங்கொ
நமஸ்கார்.

"ஹாது மகொ சளிஸு" மெனஸ்தான் அங்கொண்டெ ந:ன்ன
ஸொம்மு கெரி ஸவ்ராஷ்ட்ர மாதாக் கலத்தெமொ மீ ஜுக்கு
ஸொந்து பொந்தரேஸ்.


அம் ஸவ்ராஷ்ட்ருனுக் பரம்பரா காம் ஹாது மகா விங்கிரி.
பஷுது ஸவ்லொ நொவ்வ நொவ்வ தினுஸுன் கெரி வினத்
தெமாம் அமி கெடியானுன். ஹிந்தாகு ஸவ்ராஷ்ட்ருன் வினரிய
பஷுது ஸவ்லானுக் புலொக் அஸ்கொ கிரயி ஸே, ப்ராமொ ஸே.,

இக்கெ ப்ரபாவ் பொரெ ஹாது மகா மஹத்வு சளிஸ் கீதும்
ஸங்கிரெஸ். அம்ரெ ஸவ்ராஷ்ட்ரிம் ஸிங்கார் காவ்யு லிகன்
முஸய் மெனி எல்யொ செவ்தி களல்லிரான்.

இயெ காவ்யு தெரெ தும்ரெ அபிப்ராயுன் மொகொ பஜெ.

10/38எ. பந்தடி 4வது தெரு,
மதுரை 625 001.

ப்ராமொக,
தாடா.ஸுப்ரமண்யம்



தூடா ஸுப்ரமண்யம் லிகெ இதுர பொதின்

1. கச்சம்பொ
2. சதுஷ்பதி சனிஸு
3. கூட கெனின்
4. ஹெதொ
5. ஸவ்ரஷ்ட்ர ராமாயணு
6. ஸவ்ரஷ்ட்ர பாடமாலொ
7. சந்திகள்
8. நம்பர் இல்லாத கார்